

FRIÛL-VIGNESIE JULIE: UN IMBROI SPECIÂL CHE AL DURE DI VINCJ AGNS

Cuindis agns daspò che âltris cuatri regjons talianis (Tiroi di Misdì, val d'Aoste, Sicilie e Sardegne), stant daûr di ce che e proviodeve la Costituzione, ant vevin bielzà vût ricognossude une lôr speciâl autonomie amministrative, al vignive metût in vore ancje il statût speciâl de Regjon autonome Friûl-Vignesie Julie. Il parcè di chest ritart, sui tiermins costituzionâi proviodûts, si lu capis a sec cuant che cuntun colp di man avonde sfaçât, jù par Rome, daspò la vuere pierdude, si veve volût inventâ une regjon mai esistude, juste la regjon Friûl-V.J., che e vignive a jessi un fals storic grant tant che une mont.

Si lumà daurman che daûr dal imberdei de Vignesie Julie e jere platade la cuistion di Triest, une citât che e je simpri stade avuâl che un dêt madûr pa l'Italie, e che cul gnûf cunfin, a un tîr di sclope dal cjampanili di San Just, si jere vignude a cjatâ isolade e scjafoade in dutis lis sôs ativitâts. In cheste forme, par salvâ e dâi snait e impuartance a madame Tergeste, no si è cjatât di miôr che sgnacâje su pe schene dal mai avonde biât Friûl, par no dî che a àn vût ancje la muse rote di spampanâ che i furlans a varessin vuadagnât in cheste sorte di maridaç cumbinât tal scuindon e cul imbroi.

Cuietadis lis aghis internazionâls sul cunfin di soreli jevât, ai 31 di zenâr dal '63, si rivave a la leç costituzionâl che e meteve adun, di fat, la Regjon autonome a statût speciâl Friûl-Vignesie Julie, publicade tal doman, cul numar 29, su la Gazete Uficiâl de Republiche. Al jere il colp che al mancjave par finî di cjonçâ lis sperancis dai autonomiscj furlans plui ferbints, chêi de regjon "Friûl e vonde" e il marum al fò grant parcè che si capî che une cumbinazion usance cheste, e sarès tornade a dâsi dongje cuisà cuant.

La pluritât dai furlans, cjapade dai siei dafâs, no nasà fintremai dapît l'impuartance ledrose di cheste dade, e nancje no bazilâ plui di chel tant daûr di chel che i furlans plui rindûts a cirivin di fâur intindi cui puars e pôcs mieçs che a vevin a puart. Ma se la int si pò capîle e scusâle, chel che no si pò capî e perdonâ al è stât e al è orepresint il compuartament dai pulitics furlans, cjapâts dentri tai partîts talians, che si son lassâts meti lis brenis e manovrâ dai tabaiadôrs triestins e dai potents grops

economics e di podê, che ur stan daûr e che a fasin il bon e il trist timp ventilà, e dut chest scuasit simpri a damp dal Friûl e dai siei interes di fonde.

Ai è dibant fâ la note dai vantaçs che i son vignûts al Friûl de cubie sfuarçade cu la crôs gjuliane. Si è tacât cul volê meti il capolûc de regjon a Triest, e chest nome par un fat di innomine e di bieles presince, dismenteant cun volude tristerie che il centri storic, gjeografic, pulitic e economic di chest teritori al è invezit simpri stât Udin. Cussì ducj i ufizis, la tressadure burocratiche, ma sore dut i puescj di lavôr che il baracon regjonâl al à burît fûr, ju àn brincâts i balinadôrs dal molo setim, che tant i furlans, usâts a lâ a vore tal forest, no si saressin cjatâts in mistîrs che ju obleavin a scugnî stâ sentâts e tal sierât. Altris sprocs: la rabie e il spitic triestin cuintri la Universitât Furlane di Udin, il scandul dal aradio regjonâl che al fevele nome e simpri di Triest e des sôs trainis, cuntune insistence che e rive a stufâ i triestins stes. E cemût no pandi dai tancj miliarts strassâts par tignî in pîts la culumie, simpri clopadice, di une des citâts plui sioris d'italie, par reidit; la pice dal scjali vergogne di Cervignan; il dopleament de ferade Pontebane, l'autostrade Udin-Tarvis, dutis oparis pratindudis par dâ lavôr e slargjâ i traffics al puart de parone, e dulà che i furlans a àn vuadagnadis nome lis cuatri palanchis dai lôr terens spropriâts e un goso di gnervôs? Ma no contents di tant e cul rimpin dal compatât di Osimo, che al sierave la cuistion dai cunfins jenfri l'Italie e la Jugoslavia, e che al proviodeve une zone francje industriâl, a miegis cui Sclâfs, sul Cjars, i triestins a mandavin a trai i partîts talians, metint in pîts la liste civiche dal melon. Il truc al jere induvinât in plen parcè che i partîts talians, purpûr di tornà a cjapâ i vòts lâts a passon, ur prometevin, ai tergesteos, la lune e ce; e juste par chest une piçade dai miliarts dal Friûl teremotât a laran a fâ il nît sul cuel di San Just, e dulintor.

La regjon e à fat ancje robis buinis e di sest, no si pò dineâlu, che no sin vuarps e nancje orgnans cui parevôi sfodrâts di persut. Ma il bon, il gnûf, lis oparis e i servizis che pardabon a funzionin, a àn podût cjapâ pît soledut pal impen metût dentri de part furlane, che e à dât di viodi di jessi plui vierte di ideis, plui vivarose e cun plui voe di fâ tal frontâ i problemis, e chest nus à zovât massimamentri par saltâ fûr de brute consequence dal teremot di siet agns indaûr. Chel teremot che nus à fiscâts cence remission, metint in genoglon il cûr de miôr Furlanie, ma che al à ancje dât une scjassade a la nestre cussience etniche indurmidide, risurint tal popul furlan une brame di vere autonomie

pulitiche, culturâl e economiche, che la regjon imbroi Friûl-Vignesie Julie nus à dineât scuasit dal dut.

Vincj agns indaûr, atôr di pre Josef Marchet, no jerin in tancj a crodi te regjon "Friûl e vonde". Cumò, par furtune, i timps a van mudant e la sô semence e je daûr a butâ fûr cetancj ravois che a prometin une vierte sflandorose pal Friûl.

Tornant al cantin de regjon, il fat stes che ancje i socestants e i pulitics di ducj i colôrs e savôrs, a fevelin di chescj timps che tocjarà viodi di mudâ l'impiant di cheste cubie mâl imbastide, stant che lis dôs realtâts, furlane e triestine, a van dilunc a intindisi avuâl che il gjaul e l'aghe sante, al ven a dânus reson che in cheste forme no si pò plui lâ indenant. Par altri nol è il câs di tacâ a cjantâ vitorie e nancje di vendi la piel dal ors prin di vêlu brincât. La regjon "Friûl e vonde" o podìn jessi sigûrs che nissun no nus e regalarà; o varìn di vuadagnâse cul nestri impegn e no stufantsi di domandâ, cence un marilamp di polse, che nus vegni dât ce che nus spiete par dirit e seont justizie.

Editoriâl de La Patrie dal Friûl di Fevrâr dal 1983, n. 2